

光緒山西通志

孝友錄一

錄三之一

山西通志弟百二十八

羅士出身頭品職兵部侍郎兼都察院右副都御史巡撫山西提督軍務張獻忠
旨監修

劉向撰孝子圖各繫以傳世所傳郭巨丁蘭董永事全本尚
說而其文不見於漢書隋經籍志所列孝子傳十餘家半出
江左北俗質樸尅有稱述故北史採輯孝行惟據褒揚所及
甚寥寥也新唐書孝友傳言當時閭巷刺草之民皆得通名
朝廷書之國史所錄二百餘人爲晉達者得四之一可謂盛
矣而史例所限姓氏僅存行事不具會昌中晉州趙珣嘗撰
孝行志二十卷當有足補史闕者書又佚不傳則夫古今至
性卓行事隱閭閻名湮竹素者可勝數哉有明一代旌典縱
廣方乘繁興始多可記然見於史者亦未能有加於唐也舊

志統敘孝義自春秋以逮

國初約得千人雖忠孝義烈均爲王化所先而當我

朝

列聖重熙之後風俗茂美建坊入祠歲有增益汲引旣宏惇勵
愈眾百餘年來溢於舊志者已及倍焉爰仿唐書各區爲篇
專錄孝友仍斷自漢始臚其姓氏事蹟於左

歷代

漢至明

溫壽祁人序子爲鄒平侯相棄官乞序骸骨歸葬光武嘉其
孝許之

鮑昂字叔雅上黨人父德被病數年昂俯伏左右衣不緩帶
及處喪毀瘠三年抱負乃行服除遂潛於墓次不關時務舉
孝廉辟公府連徵不至卒於家

右漢二人

舊志列董天云萬泉上孝村有墓碑案太平御覽引劉向孝子圖董永千乘人

墓不當在蒲府志駁之是矣而因其人不見於史

遠斥爲委巷流傳則九妄其事以見法苑珠林及漢武梁祠畫像題字

范隆字元嵩雁門人孕十五月而生四歲亡父既又喪母哀號之聲感動行路單孤無總功之親疎族范廣愍而養之迎歸教書爲立祠堂隆好學修謹事廣如父博通經籍無所不覽著春秋三傳撰三禮吉凶宗紀甚有條義惠帝時天下大亂隱迹不應州郡辟命晝耕夜讀頗習祕歷陰陽之學知并州將有氛祲彌不復仕依於劉淵淵以爲大鴻臚曜旣僭立進爲太尉卒贈太師

右前趙一人

舊志列入漢蓋因劉淵僭號漢而誤

皇甫奴河東郡人景明初河東郡楊風等七百五十人列稱

樂戶皇甫奴兄弟雖沈屈兵伍而操向彌高奉養繼親甚著
恭孝之稱畿內大使王凝奏請標異詔從之

令孤仕猗氏人兄弟四人早喪父泣墓十載奉養其母孝著
鄉邑力田積粟博施不已景明初畿內大使王凝請標異從
之

陽引鄉郡襄垣人三歲喪父爲叔所養母年九十二終引年
七十五哀毀過禮三年服畢恨不識父追服斬衰粥食麤服
誓終身命經十三年孺慕不改郡縣鄉閭三百餘人上狀稱
美有司奏宜復其一門標其純孝詔別集書褒揚引至行又
可假以散員之名

郭文恭太原平遙人仕爲太平令年踰七十父母喪亡文恭
孝慕罔極乃居祖父墓側晨夕拜哭跣足負土培祖父二墓

寒暑竭力積年不已見者莫不哀歎尙書奏聞標其門閭
蔡祐高都人屋側產芝草人以爲孝感官都督所得俸盡給
族之貧乏者及卒家無餘貲人皆義之

封萬護代人救文之長子也救文卒萬護當襲天水公讓爵
於弟翰朝廷義而許之

長孫慮代人母飲酒父真呵叱之誤以杖擊便卽致死真爲
縣囚執處以重坐慮列辭尙書云父母忿爭本無餘惡直以
謬誤一朝橫禍今母喪未殯父命旦夕慮兄弟五人並沖幼
慮身居長今年五十有一女弟向始四歲更相鞠養不能保
全父若就刑交墮溝壑乞以身代老父命使嬰弱眾孤得蒙
存立尙書奏云慮於父爲孝子於弟爲仁兄尋情究狀特可
矜感孝文帝詔特恕其父死從違流

陸印代人歷官中書侍郎父喪哀毀骨立高澄時鎮鄴詣門
慰勉之母爲上庸公主教諸子以義方印雖創巨痛深出於
天性克遵母訓動依法度朝廷下詔褒美改所居爲孝終里
繼遭母喪哀慕憔悴遂成風疾弟搏臥病臨終語家人曰兄
羸病若此搏死不可使聞哭聲懼致感動及祖載家人方始
告之印一慟而絕弟彥師亦以行檢稱參襄城王旭軍事父
艱去職殆不勝哀共印廬墓鄉人重之率就墓側存問焉上

各府

閻元明河東安邑人少而至孝著行鄉閭太和五年除北隨
郡太守元明以遠離親養興言悲慕母亦慈念喪明元明哀
號上訴許歸奉養一見其母母目便開刺史呂壽恩列狀上
聞詔州郡表爲孝門復其租調兵役令終母年後母亡服終

心喪積歲每息日悲慟感及傍鄰昆弟雍和尊卑諧穆白首同歸

吳悉達河東聞喜人兄弟三人年並幼父母爲人所殺四時號慕感動鄉鄰及長報仇避地永安兄弟同居四十餘年讓逸競勞閭門和睦鄰人孤貧窘困者莫不解衣輟糧以相振恤鄉閭五百餘人詣州稱頌焉刺史以悉達兄弟行著鄉里表贈其父渤海太守悉達後欲改葬亡失墳墓推尋不獲號哭晝夜不止叫言神祇已忽於悉達足下地陷得父銘記因遷葬宗祖以下三世九喪哀毀如初有司奏聞標閭復役以彰孝義

裴安祖河東聞喜人少聰慧年八九歲就師講詩至鹿鳴篇語諸兄云鹿得食相呼而況人乎自此未曾獨食弱冠州辟

主簿人有兄弟爭財詣州相訟安祖以禮義責讓明日相率謝罪州內欽服之後鄉人勸其仕進安祖曰高尚之事非敢庶幾但京師遠遠實憚於棲遲耳閑居養志不出城邑後孝文幸河東存訪故老安祖朝於蒲坂帝與語甚悅拜安邑令以老病固辭詔給一時俸以供湯藥焉年八十三卒於家

裴修字元奇聞喜人駿子清辯好學歷位祕書中散主客令累遷中大夫兼祠部曹事斟酌故實咸有條貫卒謚曰恭伯追贈東秦州刺史修早孤居喪以孝聞二弟三妹並在幼弱撫養訓誨甚有義方次弟務早喪修哀感行路愛育孤姪同於己子及將異居奴婢田宅悉推與之時人稱焉以上各州屬

右後魏十二人

又二人附見

裴訥之字士言聞喜人化第五子純謹有局量弱冠爲平原

公開府墨曹掌書記從至并州其母在鄴忽得心痛訥之是日不勝思慕心亦驚痛乃請急還當時以爲孝感文宣幸晉陽留爲齊帥領東宮管記轉太子舍人奏中書舍人事坐杜弼事免官卒

右北齊一人

樊衝河東北猗氏人性至孝喪父負土成墳植柏方數十畝朝夕號慕子遜字孝謙舉秀才第一

荆可河東猗氏人性質樸能苦身勤力供養其母甘旨無乏母喪水漿不入口三日絕而後蘇者數四葬後廬於墓側晝夜悲哭負土成墳蓬髮不櫛菜食飲水而已可墓去室十餘里獨宿其中哀感遠近邑里稱之大統中可鄉人上言周文令州縣表異之及服終猶若居喪大冢宰晉公護聞其孝行

特引見焉護亦克孝其母閻氏羈敵境每見可自傷久乖膝下而重可至性可卒後收可妻子於京城恆給其衣食

皇甫遐字永覽河東汾陰人累世寒微而鄉里稱其和陸遐性純至少喪父事母以孝聞後遭母喪廬墓側負土爲墳復於墓南作一禪窟陰雨則穿窟睛霽則營墓曉夕未嘗暫停積歲墳高數丈周迴五十餘步禪窟重臺兩而總成十有二室中間行道可容百人遐食粥枕土形容枯悴營墓之初有鷓鴣各一徘徊悲鳴不離墓側經月餘日乃去遠近聞其至孝競以米麩遺之遐受而不食悉以營佛齋焉郡縣表上其狀有詔旌異之

王德代人父喪家貧賣男公奴並一女以營葬事歷位車騎大將軍從周文累有戰功歷河涇二州刺史爵河間郡公上

各府

屬

張元芮城人年十六祖失明元晝夜祈禱一夕夢神人以金篋療祖目越三日祖目瘳因舐之果明後人立祠謂之張府君廟

梁慎其先安定人官晉遂家焉九歲善文辭天性至孝授洛州曲周縣主簿親沒泣血設影供養出告入而不異生時墓側結廬負土益冢時有鳩翔醴泉之瑞絳州刺史孟說奏狀勅下旌表其門弟九思甫能言卽知孝親敬長後以孝弟徵爲嵐州錄事參軍操履清潔不期月教化大行尋引退晨昏事父母遺像有如生日

裴漢字仲霄聞喜人雅好賓遊父沒後遂絕筮從不御琴瑟歲時哀慟而已撫兄弟子情甚篤位車騎大將軍

以上各州屬

右北周七人

又一人
附見

孫淡太原人居長沙事母孝母疾淡廢眠食以差爲期母哀之後有疾不使知也豫章王領湘州拜驃騎行參軍建元三年蠲租稅表其閭里卒於家

解叔謙字楚梁雁門人母有疾叔謙夜於庭中稽顙祈禱聞空中語云此病得丁公藤爲酒便差卽訪醫及本草註皆無識者乃求訪至宜都郡山中見一老公伐木問其所用答曰此丁公藤療病尤驗叔謙拜伏流涕具言來意公以四段與之併示以漬酒法叔謙受之顧視其人不復知所在依法爲酒母病卽差建武初以奉朝請徵不至

右南朝齊二人

韓懷明上黨人客居荊州年十歲母患尸注每發輒危懷明

夜于星下稽顙祈禱時寒甚切忽聞香氣空中有人語曰童子母須臾卽差無自勞苦未曉而母豁然平復鄉里以此異之年十五喪父幾至滅性負土成墳贈助無所受免喪與鄉人郭麻俱師事南陽虬虬嘗一日廢讀獨居泣涕懷明竊問其故虬家人答云是外祖亡日時虬母亦亡故感動懷明聞之卽日辭還家就養家貧常竭力以供甘肥嬉怡膝下朝夕不離母年九十一終懷明水漿不入口者一旬號泣不絕聲有雙白鳩巢其廬上字乳馴狎若家禽焉服釋乃去天監中刺史王儼表言之累辟不就卒于家

裴子野字幾厚聞喜人性至孝幼居祖母喪哀慟如成人父疾禱請備至涕泣沾濡父遂愈及沒斂葬盡禮其墓哭處草爲之枯有白兔白鳩馴擾其側

右南朝梁二人

韓子誕文水人親沒負土築墳居喪盡禮詔旌其孝及卒視其脊骨皆毀大業末表其門閭唐貞觀中蠲其賦役

郭世雋字宏文一作郭雋文水人家雍睦七世同居犬豕同乳鳥雀同巢時人以爲義感事聞文帝遣平昌公宇文弼詣其家勞問侍書御史柳彧巡省河北旌其門閭漢王諒爲并州總管聞而嘉之賜其兄弟二十人衣各一襲

張道源祁人年十四居父喪盡孝縣令郭湛署所居曰至孝里隋末政亂辭監察御史歸闕里唐興署大將軍府戶曹參軍卒贈工部尚書謚曰節

薛濬字道陵汾陰人父拔周渭南太守濬少孤養母以孝聞幼好學有志行尋師長安何妥見而異之授以經業周天和

中襲爵虞城侯歷納言上士新豐令開皇中歷尚書虞部考
功侍郎上聞濟孝以其母老賜輿服几杖四時珍味當世榮
之後母病濟貌甚憂瘁親故弗之識母艱詔鴻臚監護喪事
歸葬夏陽時極寒濟衰絰徒跣冒犯霜雪自京及鄉五百餘
里足凍墮指創血流離朝野傷痛州里贈助一無所受尋起
令視事上見其毀瘠過甚爲之改容顧羣臣曰吾見薛濟哀
毀不覺悲感傷懷嗟異久之濟竟不勝喪病且卒其弟謨時
爲晉王府兵曹參軍事在揚州濟遺書弔祭濟性清儉死日家無遺
資子乾福武安郡司倉書佐

田德懋高平人觀國公仁恭子也開皇初以父軍功賜爵平
原郡公丁父艱哀毀骨立廬于墓側負土成墳文帝聞而嘉

之遺負外散騎常侍元志就弔焉下詔表其門閭以上各府屬

紐回字孝政河東安邑人性至孝後周武成中父母喪廬於墓側負土成墳廬前生麻一株高丈許圍之合拱枝葉蔭茂又夏常有青鳥棲其上回舉聲哭鳥卽悲鳴時人以爲孝感武帝表其閭擢授甘棠令開皇初卒其子士雄少質直孝友喪父亦廬墓側負土成墳庭有一槐甚鬱及士雄居喪樹遂枯服闋還宅死槐復榮高祖聞之歎其父子至孝下詔表揚號其居爲果德里

裴子通閩喜人仕隋爲大中大夫哭母喪明白鳥巢於冢樾兄弟八人皆有孝行詔表世爲義門裴氏

裴叔卿閩喜人景鴻子博涉有孝行時號裴會子爲貝邱令子神舉神符以上各州屬

右隋八人

又一人
附見

武宏度文水人補相州司兵參軍永徽中父卒自徐州被髮徒跣超喪所負土築塋晨夕號日一溢米素芝產廬前狸擾其旁下詔褒美旌其門

李源文水人愷子八歲家覆俘爲奴轉側民間及史朝義敗故吏讖源於洛陽者贖出之歸其宗屬代宗聞授河南府參軍憲司農主簿以父死賊手常悲憤不仕不娶絕酒葷惠林佛祠者愷舊墅也源依祠居闔戶日一食祠殿其先寢也每過必趨未始踐階自營墓爲終制時時偃臥塚中長慶初年八十矣御史中丞李德裕表薦源曰賈誼稱守圉扞敵之臣死城郭封疆天寶時士罕伏節逆羯始興委符組棄城郭者不爲恥而愷約義同列守位自如抵刃就終臣節之光由愷

始而源天與至孝絕心祿仕五十餘年常守沈默理契深要
一辭開析百慮洗然抱此真節棄於清世臣竊爲陛下惜之
穆宗下詔曰昔盜起幽陵振蕩河洛贈太尉愷處難居首正
色就死兩河聞風再固危壁殊節卓焉到今稱之源有曾參
之行巢父之操泊然無營迄此高年夫褒忠所以勸臣節也
旌孝所以激人倫也鎮澆浮莫如尙義厚風俗莫如尊老舉
是四者大儆於時其以源守諫議大夫賜緋魚袋河南尹遣
官敦諭上道帝自遣使者持詔書袍笏卽賜又賜絹二百匹
源頓首受詔謂使者伏疾年耄不堪超拜卽附表謝辭吐哀
慙一無受尋卒敬宗時擢愷孫爲河南兵曹參軍

王士昊太原府人節度使令狐楚奏狀曰右臣得太原府牒
前件人爲母阿張患病割股奉母其母所得疾漸損者臣伏

以登於大孝在禮爲難忍其甚痛於人不易王士昊長於市井利在錐刀誓以誠明之心療其羸老之疾割肉於股饋羹於堂信可以感通神明風變人俗某猥司廉察獲守方隅以此至性恐須旌表

馮秀誠榆次縣人節度使令狐楚奏狀曰右臣得太原府牒前件人爲母久病割股奉母所疾漸損者臣差當縣主簿劉戡檢驗得狀具如前申者臣伏以縱螫及膚口猶難忍援刀刺骨心豈易安前件人出於畎畝之中長在草茅之下天生仁孝日用元和忘甚痛於己軀期有瘳於親疾人倫共感名教所宗斯實陛下仁奄周王孝逾虞帝陶蒸動物之性啟迪仁人之心况臣守在方隅職司廉察據其至行恐合褒稱王燕太原人珪孫也性至孝爲徐州司馬母有疾躬奉湯劑

彌年不廢帶數從高醫游遂窮其術困著外臺祕要討釋精
明世寶焉歷給事中鄴郡太守治聞於時

溫振并州祁人中書令彥博之子少有雅望官至太子舍人
居喪以哀致卒

盧遺仁王知道胥太原人事親居喪著孝行旌表門閭賜粟
帛州縣存問復賦稅

趙雋字子奇平陽岳陽人父聃爲縣西曹書佐嗜酒夜歸里
墅橫臥途中雋年十八見父歸遲卽尋迎之父醉負而不勝
脫已衣覆之時冬中沍寒方甚雋單衣而已岳陽山多鷲獸
夜有豹視之爲之歧道而去將旦與父同歸縣吏異之時人
以雋孝感所致父卒不呼相者自營邱封有白鶴常遊其家
棗樹雋每朝夕臨哭鶴鳥爲之悲鳴終喪而去會路帥劉稹

反家近潞發軍士齊討民散走時雋母年八十餘唯一子乃平其父墓別以物識之輦其母入文城西山妻蹇步從之至數宿妻方至逃難者多餓糧踊貴雋拾橡實飴之以木蜜供膳者終歲逮稔滅復輦其母東歸岳陽邱隴悉爲軍士所發唯雋家墓得完復起家焉母卒哀毀過制縣令京兆韋伯倫知之給米粟蠲其家雋將葬母貧鬻其子質劑已定其夜夢一人謂曰爾舍東有錢百萬乃自發之及旦雋自舍東手掘之果得錢符夢數焉

曲沃張君密秦德方馬元操李君則太平趙德儼皆數世同居旌表門閭賜粟帛州縣存問復賦稅

盧操河東人幼勤學通孝經論語事繼母張氏以孝稱張生三子溺愛命操主炊操服勤不倦張遺子讀書命操隨讀執

鞭三弟縱酒忤人致踵詎母操泣拜慰解之惡少云不忍以三賊而詆長者相與拜操而去繼母亡操持喪哀毀訓弟有恩後擢明經授臨勇尉官舍設父母几筵出告反面晨興冠帶讀孝經一遍然後視事讀至喪親章號咽不勝孝行卓然二子雲文俱恭謹有父風

董全素河中虞鄉人商州刺史溪弟孝慈友弟溪坐事棄同官令歸溪沒比葬三年哭泣如始喪大臣高其行白爲太子舍人

蒲州賈孝才虞鄉董敬直河東張金城呂神通呂雲呂志挺呂元光趙舉張祐姚熾張師德馮巨源杜山藏皆事親居喪著孝行河東李忠孝韓放陳涉虞鄉張抱玉骨秀英皆割股療親旌表門閭賜粟帛州縣存問復賦稅有授以官者

張光兆潞州人親疾刲股旌其門閭

鄭興故永安縣人幼有至性父卒水不入口者三日事母力勤稼穡以供甘旨母病湯藥必親嘗七日不解帶又割股以療之貞觀元年有司具以聞于朝時適病縣名與涪州永安同又欲旌興之卓行遂改縣與所居之里皆曰孝義云

高平雍仙高數世同居旌門賜粟州縣存問復賦稅以上各府屬

張琇河中解人父審素雋州都督有陳纂仁者誣其冒戰級私庸兵元宗詔御史楊汪卽按纂仁復告審素謀反汪收審素當實反斬之沒其家琇與兄瑄尙幼徙嶺南久之逃還汪更名萬頃瑄時年十三琇少二歲夜狙萬頃於魏王池瑄斫其馬萬頃驚不及關爲琇所殺條其狀繫於斧奔江南將殺構父罪者然後詣有司道汜水吏捕以聞中書令張九齡等

皆稱其孝烈宜貸死侍中裴耀卿等陳不可帝亦謂然謂九
齡曰孝子者義不顧命殺之可成其志赦之則虧律凡爲子
孰不願孝轉相讎殺遂無已時卒用耀卿議者以爲寃帝
下詔申諭乃殺之臨刑賜食理不能進琇色自如曰下見先
人復何恨人莫不憫之爲誅揭於道斂錢爲葬北邙尙恐仇
人發之作疑冢使不知其處

張志寬安邑人隋末父喪哀毀骨立爲州里所稱賊帥王君
廓屢寇掠獨不犯其廬鄰里賴而免者百餘家後爲里長于
縣一日稱母疾急求歸令問其狀志寬曰若心痛則知母有
疾矣令大怒曰妖妄之辭也繫於獄馳驗其母如所言令異
之慰諭遣歸母沒負土成墳手蒔松柏鳥巢于上志寬哭臨
鳥輒悲鳴高祖遣使者就弔拜員外郎散騎常侍賜物四十

段表其閭

解縣衛元表安邑曹文行孫懷應相里志邵法同張衡曹存
勳李文褒董文海李文秀張仙兒張公憲皆事親居喪著有
孝行安邑任君義衛開皆數世同居解縣南鍛割股療親俱
旌門賜粟州縣存問復稅有授以官者

王助字子工龍門人通孫七歲喪母悲號鄰里爲泣居父憂
哀毀骨立爲監察御史裏行

高祿皇稷山人秀嚴子以孝友直方聞於時充成德軍節度
使兼都虞侯經略副使丁父憂竭產盡心徒跣扱衽扶柩自
幽陵歸葬廉城

王質龍門人通五世孫少孤客壽春力耕養母講學授徒無
住進意逾四十始擢科累官諫議大夫以直諫出爲虢州刺

史後爲河南尹終宜欽觀察使清白畏慎所至有惠政民胥德之

趙師舉絳州人父爲人所殺師舉幼母改嫁讐家不疑師舉長晝爲人傭夜讀書久之手殺讐人詣官自陳高祖嘉其孝赦之

裴敬彝聞喜人子通曾孫七歲能文章性勤敏宗族重之號甘露頂父臨黃令智周爲下所訟敬彝年十四詣巡察使唐臨直枉臨奇之試命作賦賦工父罪已釋表敬彝于朝補陳王府典籤一日忽泣涕曰大人病痛吾輒然今心悸而痛事叵測乃請急倍道歸而父已卒羸毀踰禮乾封初累遷監察御史母病醫許仁則覽不能乘敬彝自爲輿往迎居喪詔贈縑帛官爲作靈輿終服以著作郎兼修國史歷中書舍人太

子左庶子武后時酷吏陷之沒於嶺南

正平周思藝張子英龍門梁神義賀見涉張奇異皆數世同居絳縣張子英親疾割股並旌門閭賜粟帛州縣存問復賦

稅

以上各州屬

鄭潛曜者父萬鈞駙馬都尉母代國長公主開元中主寢疾潛曜侍左右造次不去累三月不齷面主疾急刺血爲書請諸神可以身代火書而神許二字獨不化翌日主愈戒左右無敢言後尙臨晉長公主厯太僕光祿卿

右唐六十七人

韓德屯留人累世同居母死廬於墓側累年種瓜供祭瓜有合歡帶之祥詔旌其門

右五代一人

劉孝忠并州太原人母病經三年割股肉斷左乳以食母母病心痛劇然火掌中代母受痛母尋愈後數歲母卒備爲富家奴得錢以葬富家知其孝養爲己子後養父失明舐之經七日復能視劉鈞聞而召見給衣服錢帛銀鞍勒馬署宣陵副使開寶二年太祖親征太原召見慰諭

李居仁曲沃人父早喪事母孝日授生徒以供飲膳母沒築土爲墳高四丈餘時名其巷曰孝母名其族曰墳臺李氏至今因之

薛繼先字曼卿河東人好學有高行少舉鄉試南渡隱居教授不接權要事母以孝聞子純孝有父風俱以能詩有聲于

時宗鑑先金未人見中州集
洪善志誤次於此附訂

姚宗明河中永樂人十世祖栖雲當唐貞元中調卒戍邊栖

雲父語其兄曰兄嗣未立可無往弟幸有子請代行遂戰沒
寨上時栖雲方三歲母再嫁伯母養之既長事伯母如母伯
母亡葬之又招魂葬其父廬於墓次終身哀慕不衰縣令蘇
輒以俸錢買地開阡刻石表之河中尹渾瑊上其事詔加優
賜表其門名鄉曰孝悌社曰節義里曰敬愛栖雲生岳岳生
君儒君儒生師正四世胥廬墓五世孫曰厚六世曰雅七世
曰文八世曰敬真九世曰直十世爲宗明當慶厯初有司以
姚氏十世同居聞於朝仁宗詔復其家十一世孫用和十二
世孫士明十三世孫德自宗明至德又三世矣五十餘年而
其家孝睦不替姚氏世爲農有田數十頃聚族百餘躬事農
桑厯三百餘年無異辭經唐末五代而子孫保守墳墓不相
離散求之天下未或有焉

邢濬潞州人八世同居咸平中表其門

元象汾州人始末無考今元象泊其遺跡也舊志稱其有孝行嘗耕六壁城下

任康節汾州人少遊學祖母李思之恍惚至側誦佛經因急歸不復出遊祖母沒哀毀特甚躬爨以養祖父

郝戴石州定胡人家貧竭力養親舉進士歷通山令時年未五十以父樵老上書請致仕爲父求官執政諭使赴官而後請則可乃留妻子于家獨奉父行踰歲竟謝事得太子中允

以歸及樵卒自負土爲墳詔賜粟帛

以上各府屬

李志學孟人天性好學成大儒登淳熙進士授校書郎母沒廬墓三年日夜號泣不已子長福次壽同登進士人以爲孝

感

趙甯保德人十世同居家至數百餘口治平間知州折繼祖
奏請賜米五十石絹五十匹特敕旌其都爲義門至今仍之
董孝章解州人十世同居大中祥符中表其門乃蠲課調
樊景溫芮城人兄弟異居積年大中祥符中樛樹五枝并爲
一感其異復聚鄉人稱其雍睦

劉太夏縣人爲醫助教居親喪絕葷者三年司馬光稱爲今
士大夫所難能作序賻之

周文燦其兄嗜酒仰燦爲生兄或酗毆燦鄰人不平而嗜之
怒曰吾兄未嘗毆我爾何離間吾弟兄也

蘇慶文夏縣人事繼母以孝聞母少寡慶文懼其妻不能敬
事每戒之曰汝事吾母少不謹必逐汝妻奉教母得安其室
終身

臺亭夏縣人工畫元豐中修景靈宮調天下畫工詣京師選其優者待詔翰林昇以官祿享名第一以父老固辭歸養閭里賢之

趙友隰州人七世同居真宗時表其門

以上各州屬

右宋六十八人

許琇曲沃人登大定進士會兵亂負母避山東旣而歸鄉服父喪始終如禮鄉黨取法焉子良力田積善不求聞達孝行炳著廬親墓三年不怠里閭稱爲孝子

張錦河東人大定十年尙書省奏錦自言復父仇法當死上曰彼復父仇又自言之烈士也以減死論

張仁機明昌三年有司以仁機四世同居事聞詔表其門免族差二年太常博士毛庶爲記云

龐整河中人父早喪事母孝及母卒合葬塋域整卽日屏妻子自入幽隧哀慕不翅生事其子源嘗入視整偃仆救之方甦隨中忽發異香後整孱困不勝夜有人送藥服之愈人以爲神勅賜旌表

申明河中人膂力過人以傭直事母時盜賊夜劫殺人明一夕出母被殺假寐田畔夢母謂曰吾已死賊手矣賊東南行可追之明亟返會眾尾賊道渴明給眾曰至百里亭有井至則索賊不獲目眦俱裂遂仰天憤痛而死鄉人義之爲立祠於丁庄村

麻秉彝河中人以孝聞皇統中進士歷官兵部侍郎

張完高平人父早亡事母以孝母久病妻養母有怠卽出之會歲祲出粟賑饑多所全活有貨錢者百餘人度不能償盡

焚其券

趙振陵川人性質淳厚樂施予父沒哀感三年人稱其孝析居資產讓兄擇自取其薄里中貧不能葬者悉爲贖賻又施藥救人全活者多遇異人曰公陰隲厚後必光大其門至天眷中二子安時樂榮皆狀元及第

以上各府屬

趙瑛孟縣人父卒哀毀過禮人稱其孝子世林爲報政者知舉授百夫長孫大爲爲祁邑鄉百戶亦以孝稱人咸美之劉義孟縣人五世同居二百餘口庭無閒言家無私蓄大定中授進義校尉子貞孫曰輔曰允皆登進士

楊正德忻州人與弟庸德俱以孝聞父沒兄弟哀毀及葬同廬慕側朝夕哭踊者三年金末兵亂一家免害人以爲孝感

以上各州屬

右金十一人

又二人
附見

溫義祁人五世同居長幼無私財家庭無間言至元丙子旌

其門曰義門

以上太
原府

房輯臨汾人鄉貢士祖祺父希文俱擅學行名輯有孝行至
正間盜陷平陽繼母爲賊所執將殺之輯以身護遂遇害

吳著襄陵人至元初平陽路長官慝升延安路轉運使母喪
廬於墓側負土崇封瘠甚不怠以孝廉著稱於時

孫抑洪洞人舉進士仕至刑部郎中有孝行關保之變孳家
避兵平陽之北村遇賊欲刃其母抑以身翼請代得免父爲
所擄抑奮身往尋之屢瀕危殆竟奉父歸里稱篤孝

胡光遠太平人母喪廬墓一夕夢母欲食魚晨起號天將求
魚以祭見生魚五尾列墓前俱有嚙痕鄰里驚異方共聚觀

有獺出草中浮水去始知獺取獻以狀聞於官表其閭

靳曷字克昌曲沃人學士榮弟六歲知學諸疏義皆能默誦
同兄奉母王氏以官於朝母卒曷與兄護喪還家至平定之
平潭大雷雨曷扶柩上呼天長號榮呼之避水曰吾避奈母
喪何須臾暴水至遂漂沒而死水退得柩于三里外事聞詔
賜孝子靳曷碑學士揭侯斯奉勅撰文

馮愈吉州人父敬夫病篤籲天割股調藥父遂愈至正間旌
表其門以上平陽府

梁外僧河中人至大間親喪廬墓兄那海爲奧魯官自以嘗
遠仕不得養其親棄職舉外僧代之人稱外僧能孝那海能
義

陳元凱臨晉人克基孫應之子性英毅有操行事父母以孝

聞至元間太保劉文貞薦舉扈從累仕顯職積階諫議浙東
海右道肅政廉訪使追封潁川郡侯謚靖宣子敬立舉明經
官開成路治中

樊珪河東人有孝行至大間爲大都提舉母思泣喪明珪聞
卽日解歸以舌舐母目七日復明有司以聞詔旌爲孝感之
門

王庭祥猗氏人七歲遭妹殤哭甚哀旣瘞悲曰妹入土不可
復見他日父母沒庸可見乎于是事之益謹凡得鮮必先奉
二親每上食必親供八拜因事有缺歸記補之如是者十七
年父背嘗病癱久不瘥庭祥以口吮膿而愈母目失明庭祥
以舌舐復明事聞旌表其門

梁福蒲州人幼習戎事精騎射渡江平宋有功授奧魯官副

統軍旅母周氏恙弗起謂福曰汝弟祥事吾孝吾沒後可以爾官讓之福敬諾及母卒同弟披髮跣足負土壘墳事聞旌其門

杜昭河東人襁褓中失母繼母吳撫之甚厚及長事吳孝吳卒廬墓三年朝夕哭奠

張九霞字凌漢蒲州人少負穎質沈重寡言笑好丹鼎鉛汞之術後讀太極圖西銘正蒙等書遂潛心正學家貧父適蜀圖生計九霞親操作奉母以養祖母劉至備書囊祖葬事一日其母曰汝父客蜀已十五載存則扶掖而來否則與視歸邱隴九霞伏泣曰向所以不欲遠覓者以母無依故也今婦能事母又延一綫之續卽當長往遂徒步以西繫貲不滿百錢遇一宋姓者感其孝贈以金乃陟秦嶺穿子午道抵瀘越

滇南歷撤蒙中慶徵江大理諸路凡三易寒暑跋涉五萬餘里不可得皇急籲天返瀘就旅次日將晡一叟從外入雪髯丹顏向客語生平似蒲人熟聽則其父也相向啼號觀者嗟訝迎以歸生平勉人爲善有橫逆相加者受之不報贖人已驚之癡女及聞驚啞女者多其值買之恐他人之不遂其生也其天性慈祥類如此

以上蒲州府

李术魯克恭上黨人生二歲父母俱亡育于外氏比長追念親劬常悲風木兄某旅喪歸其遺骸伯嬾失養躬具甘旨及終以禮葬人皆以孝友稱之

和孝中長子人貧甚力穡養親父沒廬墓三年形槁廢櫛沐髮幾脫人多憐之至正間旌爲孝子

王恭長子人母薄氏寢疾躬奉湯藥迨卒哀毀廬墓側適妻

李氏沒子明亦哀毀廬墓會兵興焚掠父子相對飲泣不去
學士吳允爲記有碑

張甫襄垣人五世同居至元初旌表

申克讓黎城人父天佑卒葬之日克讓繞號痛遂廬墓側寢
苦枕塊負土成臺三丈許築室繪像以致思慕三年之間始
終如一詔旌其門

以上潞安府

李邦用介休人少有大志不泥俗學孝弟出於天性後登進
士凡居官教人一一以孝弟爲先時望歸之

韓子中石樓人性孝友弟子同嘗以罪當棄市子中以其子
幼往代其死主帥察知遂免弟罪禮送子中還鄉

褚伴哥石樓人隨父布哈守淮安城陷父子力戰及父中傷
伴哥冒刃救護被殺

車世榮石樓人官鳳翔路陰陽教授以孝行旌其門

以上汾州府

李義陵川人蚤喪母繼母龐氏鞠義如己出義孝龐氏如所生龐有疾醫不效義懇禱北辰所以身代乃密割股肉和糜以進跪告曰兒別得神藥飲之卽愈已而果愈人問其故終不言久之人見其脇左有刀痕知爲割股救親詔旌表後以

子廷實貴贈嘉議大夫兵部尙書

以上澤州府

袁表廣靈人祖衰老父吉家貧莫能供菽水杞載乃翁送山中歸投杞於薪表取而懸之吉詰曰兒誤矣懸此何施表泣對曰預爲阿翁具吉聞之俛首表知父悔悟乃引杞循故徑載翁以還至今杞跡所歷處草皆偃

以上大同府

楊士元武鄉人讀書力耕事父晨昏不廢定省族有貧者悉爲婚喪鄉人高之孫德修以十歲舉明經

以上沁州

山西通志卷一百三十一 三十一
王文翰孟縣人家貧備書養親年五十母雙瞽翰每夜默禱於天母目復明人以爲孝感二子曰仁曰義俱登進士皆以文學孝弟聞稱世德云

高濂孟縣人舉孝廉知太原府事弟清同知保德州事津樂平縣令浩獲鹿縣令悉有惠政子貴孫廣以恩補溧陽令居家和睦同爨二百餘口

李朝英孟縣人至元間進士授汾州判五世同居百口無間言泰定中旌表

張起元孟縣人由進士令平原以孝友稱賊過相戒不入曰無犯義門

胡彪樂平人有孝行父母相繼卒廬墓側二年哀毀骨立有司奏聞表其門終身不復仕曰吾親逝矣仕將何爲教授鄉

里人稱松風先生

以上平定州

樊大臨定襄人任宣德路稅課副使父天用語曰吾家不甚貧毋苟取以累我大臨廉謹自持每歸省陳行李於前後聞父疾馳歸相見乃卒服闋不復起

以上忻州

王居敬崞縣人與弟居智居信俱以孝稱父德順沒同廬墓側三年人稱一門三孝子

皇甫世忠崞縣人母卒廬墓盡哀自祖而下封墓高丈餘皆自築手爲血裂州上其事未旌而卒士民悼之

以上代州

趙天爵字伯廉夏縣人嘗爲吏多平反惇行孝弟治家甚嚴三子皆頽然玉立母喪廬墓三年父繼喪又如之惟蔬食菜羹不茹酒肉不與妻妾見有司以聞詔旌其門復其身

以上解州

姚好智絳州人居喪廬墓見元史孝友傳

呂祐字伯通絳州人至正二十六年城破有卒入室脅其母索貲不得揮刃欲斫之祐急以身蔽母奪其刃指盡落傷仆地良久而甦開目視母曰母幸無恙死可無恨遂隕目而死唐義橋絳州人三十喪父母五十猶衰麻常建橋於稷山縣南汾水上

劉信字仲寬河津人穎悟非常少孤事母至孝或勸之仕曰余夙喪父今以身事君如事母何居鄉無小大悉持以敬人有爭訟難決者詣請平之母沒隱居龍門讀書終身後旌表

其門

以上絳州

李忠趙城人與弟恕皆幼孤天性至孝事孀母宋氏克供子職大德七年地大震郇堡山移所過居民廬舍皆摧壓傾圮將近忠家分爲兩行五十餘步復合忠家獨完人皆以爲孝

感元李崇德爲作孝感碑

以上霍州

右元三十七人

又五人附見

段廷用陽曲人奉孀母極孝母沒廬墓歲饑盜不忍驚害種瓜麥雙歧並蒂人以爲孝感云

周神陽曲人事孀母姜圖刀圭以奉甘旨侍疾送終胥如禮結廬墓側盜賊相戒勿驚

程書陽曲人父宗齊中溼衣不解帶延八月竟不起哀毀骨立事母張彌孝敬鄉評重之舉於官綽楔表門又程巖事母以孝聞

薛敬陽曲人宏治中以孝行旌見明史

朱慎鍛晉靖安王長子幼好詩書敦孝道奉兩尊承顏順志性若天成母妃盧疾危呼天割股以進後又因盧病晨夜侍

山西通志卷一百三十一 列女
疾求以身代及母愈因過勞成疾而卒

馬謨太原人父早逝事母委曲盡歡廁衾悉躬自浣滌母登大臺喜不勝懼祝天以已算益之及施濟無告哺育棄兒以祈母壽母卒飲食胥廢葬畢以哀思亡

王英太原左衛人少孤育於祖母封股以進尋愈成化中由舉人授滕縣令有惠政升登州府通判

陳舉太原左衛人事嫠母至九旬孝思愈篤母卒廬墓三載舉時年已七十矣

趙定太原前衛人兄宥逃難鬻所居以助之一夕竊者入其室善言勸諭慮爲邏者所獲天明始遣去子某登賢書

段廷宴太原貢士任撫甯縣令事親竭力居喪三年人莫覩

其面

趙威晉太原人父本以諸生游學威晉生未期歲及長以不識父面爲恨言輒流涕遍詢僧道或告以在終南山卽日推小車覓之果得扶歸

趙洪遠太原人事父珺母張自受飢寒竭力奉養巡按趙飭所在給穀以示獎

劉玘臣太原人父病噎食百計求愈不得或以刲股可療從之病果愈

趙復性榆次諸生父卒號泣不食數隕絕及葬廬墓草衣糲食終喪不忍離族人毀其廬載歸後旌表

趙復性榆次人宏治中以孝行旌見明史

劉陽榆次人插部內侵時未週歲母棄之祖母王道問啼聲挾陽以歸王氏寡居四十餘年陽朝夕不離及沒圖形事之

韓朝花太谷人家貧業推小車出外必計往還日備飲食費以供父母出告反面跪拜惟謹聞妻少觸忤卽痛箠之

程文宿太谷人朴實不知書母疾祝天以已算益之母卒哀毀骨立廬墓三年又貢生李元顯事母至孝居喪盡禮賈謨者家貧業染母年七十逐日力養得美食卽以奉母

孫昂交城人父沒廬墓羣鴉悉集朝去暮來嘗之蒲州渡黃河有老人同渡拽舟使獨後俄見前船覆溺昂乃得免

張俊明交城諸生事繼母撫羣從以孝友著

閻大綸榆次人以貢擢容城教諭履行端粹父疾焚香虔禱減已壽以延父齡兄性剛烈委曲承順時稱孝弟

劉盈清源人童年知孝母蘇病危刲臂肉以進病尋愈

劉漸清源諸生少孤竭力事母母疾亟禱得仙方服之卽愈

劉秉寬清源人母畢氏病刲股以進病卽愈一夕如聞母呼驚覺出門屋梁隨折枕爲之碎弟秉暢悞傷人至死訟於官寬憫其無子代受刑其人二日復甦遂得釋又王遠閩海俱以廬墓稱孝

孟養氣文水人事繼母撫諸弟以孝友著

張鳳翔文水舉人孝事嚴父父沒號泣蔬食三年又李玫王府典膳事稜母惟謹母卒廬墓盜不忍驚又諸生胡誥親沒廬墓人稱其地爲孝子窟

郭施字子福文水人父廷詩好施與施能繼之親疾禱神求代沒則號泣廬墓年老無子夢神語曰爾孝德格天當錫爾子果舉嗣應龍應泰孫鉉俱以文行名

正景能祁人事孀母以孝聞孫天爵領鄉薦又渠永昌以孝

友累賓鄉飲壽至九十九歲又閭紹芳祖喪承重茹素三年
又胡濂赴兄急難慷慨殺身

李瓚太谷人事母甚孝家百口同爨曾獲盜乃素相識遂遺
布匹遣之

李春茂嵐縣人

縣志作楊春茂

孝事父母母沒事父尤謹直指某給

粟以旌之

邱憲章嵐縣人力農好施與敦孝弟父疾步禱恆嶽不解衣
者旬月母疾籲天求代疾尋愈子瑀以歲貢簿岐山有政聲
事繼母曲承意旨孫如翼亦有孝行又劉光旭貢生李大盛
俱以刲股愈親疾

溫和嵐縣歲貢判河間上簿事祖母張氏稱順孫父錦卒事
嫡母梁生母田以孝稱

郭安興縣人陝西衛經歷前後廬墓六年有白鶴旋繞之異
又有諸生白孝古廬墓六年均奏得旌表

郭安見明史
正統中旌

又有

監生康玉潔亦以廬墓稱孝
白好古興縣人宏治中以孝行旌見明史

胡玉琴興縣人父博娶關氏生尙默次娶甄氏生玉琴甄病
兄弟並事之維謹及沒並廬墓側父沒琴復廬墓哭思成疾
卒妻劉氏年少撫孤稱節孝

韓子名興縣人祖母母俱孀居竭力奉養祖母卒哀毀骨立
母卒廬墓三年

馮時亨興縣人父瓊諸生早卒母康氏邁危疾思得鹿肉禱
於神封股肉代之疾尋愈又有白璽亦祀孝義祠

王朝冕興縣人母疾禱神代死及卒與兄廬墓三年朝夕哭

莫有司賜米帛扁旌兄朝冠亦以孝稱而朝冕爲諸生有聲
常福交城諸生父沒廬墓日夜悲泣者三年萬厯間旌表又
呂誠母死廬墓稱孝

金中夫

一作天夫

榆次人弱冠時父鼎罹危疾刲股和湯以進疾

遂瘳登正德鄉試任戶部司務歷工部郎中大工屢興財不
告匱詔褒其能尋守鞏昌多惠政逾年歸家無餘蓄

裴潤陽曲諸生居喪哀毀廬墓三年以子希度官贈奉政大
夫通政司右參議祀鄉賢

以上太原府

崔敏字好學襄陵人生四十日其父仕元爲綿竹尹父子隔
絕者三十年敏母兄以居元季寇亂人皆駭竄母及兄俱相
失亂定入陝尋母不得由陝入川抵綿竹求父家無知者復
還陝訪諸親故始知父殯所在乃啟攢負骸歸時稱崔孝子

張恕□□人永樂年以賢良徵授懷慶府知事母病告終養及卒竟日哀號痛絕復甦負土築壙廬墓三年朝夕哭奠

劉元貞翼城人性篤孝父平令宜黃卒哀毀廬墓常致羣鳥

飛繞異草叢生瓜蒂開蓮之異永樂中旌其門明史作劉原貞宣德年旌

續鳳臨汾諸生母游氏卒哀毀廬墓成疾感夢而愈有白燕

集墳枯木復生之異宣德間旌表明史天順年旌後官雲南布政司

照磨又孫泰通母喪亦廬墓

鄭威翼城人山東按察知事父喪廬墓三年

陳王度太平諸生母病籲天求代及卒廬墓三年張子強爲

立碑

靳馳曲沃人正統間補河南掾聞喪號泣步歸廬墓三年

李滿庫岳陽人事養母以孝聞尤好義行冬施粥火夏施茶

漿累年不輟

馬化龍岳陽人事親極孝親沒不御酒肉者十餘年

劉揆襄陵人幼喪父哀慟如成人家貧事母謹母老病不能行常負以出入及卒水漿不飲者三日廬於墓次鵲巢庭樹又負土築臺建祠其上三載面垢髮結親識憫者率以與饑貧天順間旌其門

楊輔平陽衛指揮僉事成化中以孝被旌

王淦秋岳陽人生彌歲父亡母李氏撫之七歲卽知孝養十二歲肄業郡中間母病輒奔歸隆冬單衣露禱愿以身代日夜不寢母尋愈事聞旌其門

吉昂翼城人家貧甫七歲父鸞卒母梁再適楊氏昂敏慧通陰陽學賣卜城市得粟饌雖夜半必先奉其母鄰里咸歎服

焉

張壘臨汾人父益母吉氏俱患瘋疾壘百計求愈母沒阻於父命不果廬墓刻像以事如生時宏治間旌門

梁澄襄陵人事親奉養備至親病瀝血書表禱神得愈

陳俊浮山人節婦郭氏遺腹子痛父死王事母孀居曰慈烏反哺羊羔跪乳矧人不如物乎自是朝夕拜母食必親供宗黨稱之卒年九十二孫陳孜官布政

齊一本浮山人少孤母柏氏失明力田色養垂四十年族伯思明貧老無子養生送終皆其力

朱奇渾陽曲府輔國將軍事母丁氏甚孝宏治間郡守張文佐上其事賜書褒美旌其門有尺谷子集皆名公卿所題也子表樣表檣居父喪亦以孝稱

亢良玉臨汾諸生母沒廬墓側有朱草叢生棗葉如蓮之應

正德間旌門

李大經臨汾人少賈於外母老遂跬步不出父母沒廬墓各三年正德間旌門子承芳諸生父疾夜禱求代疾竟愈父卒廬墓有羣鴉夜集白蛇盤冢之異亦得旌表

張進寶岳陽人事母盡孝母卒廬墓食粥枕苫者三年

李明襄陵人家貧事母盡孝送終廬墓有司旌之又陳經諸生六歲喪父事母劉氏曲取歡心母卒廬墓浹年未嘗歸

至世文汾西人入太學幼孤撫二弟至成立二弟早亡撫姪五人同養四十載析產分居不少私嘉靖間輸賑二百石

常一清翼城諸生樂易孝友嘗鬻產以償弟債或謂其愚清曰負人錢財而不償不義坐視弟辱不仁不仁不義何以爲

人邑人劉志有義士傳又張紹孝友好義嘉靖時巡按穆公檄縣榜其名於旌善亭

王爵鄉甯人母喪哀奠盡禮侍父榻者三年朝夕不怠由貢生官至蘇州守

徐椿吉州人以廬墓稱孝

鄭崇雅鄉甯貢生任徐溝教諭聞母病棄官歸子四人皆有名人謂孝感

周瑞浮山千總父得咯血疾危甚割股愈之

王應科岳陽人萬厯中以孝行旌

楊乙六太平人累世同居萬厯中旌其門

張瑤翼城人家世貧乏母疾湯藥不懈及卒號絕復甦寢苦枕塊塑母像於廬朝夕拜奠事父亦篤孝萬厯六年旌其門

原按山右孝子
傳作張瑤滄

李宋曲沃人事親篤孝親沒哀毀廬墓凡六年嘗於墓次拾遺棄發視爲太平某物往送還之著有忠孝錄景仰顏曾錄覺後五歌人子十二惑等書藏於家

郝根曲沃人貧傭於人母年九十餘得美食必歸奉之妻張氏失母歡卽出之

師敬岳陽人父早亡母張失明竭力承歡曲盡孝道

薛福汾西人專親孝母卒廬墓三年

劉志翼城進士官至右參議告歸事繼母曹氏同寢食者二十年居身耿介卒祀鄉賢又王三錫事母孝九十三歲如一

目

錢國用翼城人官鳳翔司李事王父母以孝稱居喪哀毀踰

禮撫弟姪有恩祀鄉賢又上官薦上官陞崔允升俱以孝友著聲

李卽芬太平諸生祖母病愿減己算以增其壽後果如所禱田一照太平人三歲失怙事母篤孝自遇生辰終日不進一水一粒嘗刺血告天祈母壽母卒幾百歲哀毀三年已旌張寶珍太平廩生親沒廬墓所有狼守之寇過相謂曰此孝子廬也慎勿驚又楊天職父喪廬墓捐穀救荒

周敏洪洞人肄業國學聞喪奔歸徑趨墓所結廬三年朝夕悲號聞者痛之

宋載洪洞人官太僕寺寺丞奉使洪都夜夢二親乞休歸

石永春洪洞人名醫良寶子父卒七年母亦卒每痛貧不能養廬墓三年日夜號泣有白兔馴擾之異

晉統洪洞人兄某坐侵官糧病故損貲以完之撫姪銑錫如已出周貧焚券毒踰八十

范祖文洪洞諸生父正己探親山東遂病亡祖文奔赴所在貧至不能具棺貸布抱檝旬歸里

李蘭洪洞諸生父侃客嶺表蘭往省聞沒於江求不獲痛哭設祭而歸母病嗽嘗藥嘗糞累求身代病尋愈既以母卒不得與父同穴晝夜號泣露宿墓側且半載友憐其苦爲鑿穴以居之三年盜賊不驚狼虎不犯偶得痢疾幾死夢吞血竭而愈人謂孝感撫按競致羊酒以示旌獎云

陰祿洪洞人弟彪景輝母商以產輝亡遂鞠於姑祿家漸饒裕姑復生子頗窘祿遂招輝還家彪有難色祿曰若來請以我財分之姑責其婚聘貲訟於官祿倍償之

張滿洪洞人天性孝友事親撫姪人無閒言築城外隄濬副
霍渠至今人食其利

衛希相洪洞諸生少失怙恃事大父母孝及卒哀痛幾絕廬
墓負薪然燈朝夕以致奠

李弼唐太平人父病飯必親視及卒痛不欲生竟繼隕

柴壯國太平人有孝行繼母生三子矣父沒欲嫁跪泣得留
又嘗獨典身以償父債繼母病澣穢滌溺數月

趙禹襄陵人幼孤事養母及祖父母備極色養客於淮里人
有縲繫者傾囊脫之善楷書有義方年至九十

郭尙禮襄陵人事養母以孝聞弟尙智死撫其孤如己子子
守邦舉鄉薦乃曰生計不必爲子慮慮姪耳悉推腴產與之
盧閣曲沃進士襁褓喪父孝事祖父母沒廬於墓偶遊京師

心倖遄歸母果病焚香禱天愿以身代病尋愈兄病亦身侍
伺間鄰失火及闔宅而熄時謂孝感事聞旌其門

孔江臨汾人官陝西安定訓導弟涇郡文學皆有孝行父母
繼卒相與廬墓再遇盜劫居廬如故當道目爲雙孝

西河王朱奇溯晉定王曾孫也生數月父順簡王薨稍長以
不得面父嘗痛哭刻旃檀像祀之母葉病渴禱於天甘泉湧
出母飲之病良已後母卒哀毀骨立宮墀古柏生奇花兩頭
異香襲人嘉靖時薨謚恭定子表相嗣爵亦有孝行又朱新
娃陽曲府輔國中尉事母孝每施茶粥以乞母壽云

宋永賴臨汾人儒官孝友尙義兄弟四人親沒獨任喪祭償
父債千金

冀三聘鄉甯人節婦盧子與妻潘氏事母以孝聞

王凜鄉甯人家甚貧父病思得肉食與婦定謀翦髮易之道經龍王廟致禱得夢於十里外杏樹下取泉飲父疾尋愈

韓績祖洪洞人由進士授行人事母盡孝撫姪如子祀鄉賢范芸茂洪洞諸生有學行明末負母避賊母方危病忽得痊愈與茂偕趨賊追之不及甲申避亂卦地山夜半賊執其父而去茂隨之入城賊大怒曰汝聞令否對曰偕來者令當死如父老且病何請就刑賊義而釋之杜門著書有明十六家小品評洪乘續編樹齋集

范萃茂洪洞人幼孤事母承顏頤志百計求歡母疾危篤願天求代者久之疾竟愈復分已子乳乳孤姪撫育成立及母卒哀毀過甚營葬甫竣卒

以上平陽府

王旭字士熙蒲州人性孝友叔鳳儀洪武間令盩厔論戍旭

代之行略無怨色好學精於易與御史謝琚學正曹月川相友善著有鳴樵詩集

湖潭臨晉人母死偕弟泚廬墓側朝夕拜奠時謂雙孝

王寵字君受萬泉諸生廬母墓朝夕哭奠如初喪時烏巢短桑抱卵不驚人以為孝感

王約猗氏人幼孤母牛遭風疾朝夕扶持躬親湯藥者二十餘年母卒苦塊廬墓常晝寢夢人呼曰起起水至矣俄水果至惟墓側禾無患正統二年旌門

溫錫蒲州人成化間貢生居喪哀毀廬墓致異應以孝旌石景賢蒲州人幼孤事母鄭氏至孝母卒哀毀幾絕負土營葬廬墓三載州守陳親詣慰之

王天民蒲州人父朝客甘涼迎歸而沒號泣廬墓週兩歲以

哀毀卒

王旦字得元蒲州人孝友好義繼母逼入井出無怨言撫弟溺篤輓艘者溺水漕盡覆出數百金易粟以追其罪又嘗捐八百金助修郡城云

耿顯世猗氏人兄弟四人同居無閒言隆慶中由恩貢令合水澹泊如儒素俸悉分諸弟秩滿歸投徒力田

陳志剛猗氏人自先代伍大益恭選至剛子淮七世同爨釜容石餘今釜猶存

李鴻與蒲州人過歲失怙事母孝讓產撫姪有仁厚方正稱李成芬蒲志載白屋高賢家屢空綵衣奉母祀鄉賢

謝奇齡蒲州人母病逾年衣不解帶居喪廬墓有黃雀入壙之異又朱廷珪世業農亦以侍疾廬墓稱孝

劉東旭蒲州人少受易能續父業父沒廬墓卒後督學表其事與父忠甫曾祖母牛氏並建祠東關外

魏璣蒲州人事養母以孝聞爲商得美味必遠致之或思母卽竟日馳還禱疾得愈人謂孝感

趙釗蒲州人母劉病篤祈天求代病果愈兄癡弟瞽生養死殯皆得體

洪尙仁蒲州人幼孤事母段色養惟篤母病號天求代母卒年九十有六哀毀逾禮撫兄子五皆成立完娶均財羣高其義又有劉淮孟理並耆民也均以孝友爲鄉黨所推

樊九敖臨晉人母疾籲天求代夢得神語割肉進之疾果愈李源發臨晉人事養母至孝撫弟成立人高其行祀鄉賢又李源澄亦以孝友稱

李奈猗氏人性至孝父彥和病篤思食肉家急不能得割左股作羹以進疾遂瘳時年四十尙無子後二年舉子鑑鑑子如玉山鄉薦官鄜州牧又張朝紀亦嘗割股瘳疾

王良卿字國忠猗氏人性孝友兄弟七人同居無閒言貢入太學兄以疑獄罹辟日夕焚香祝天鄰舍生見而異之詢知爲兄寃也後按山西白其事時謂誠感

曹允祥字永興猗氏諸生父患風痺二十餘年扶持不懈值地震亟呼父父自牕躍出疾遂愈壽至九十八人謂孝感

高舉萬泉人幼孤事母至孝每食必親供以貢入京思母成疾竟卒

薛昆萬泉人由歲貢令故城父喪廬墓哀毀卒

杜麟萬泉諸生七歲喪母父再娶生子麟撫之甚厚父卒廬

墓三年官邵陽丞有廉聲祀鄉賢

成思忠榮河人世有潛德自高祖以來七世同爨庭無閒言稱義讓之門有碑存焉

聶邦憲榮河人其繼母樊嘗私取金三百以遺母家父漢求金不得幽之弗令食憲謀於弟曰舅家銀不能還將奈母何罄所積取以呈父曰此前銀也母乃出邦憲後獨蕃衍人謂孝徵

楊佑萬泉諸生父斌遭疾同妻尉氏禱神求代疾尋愈

荆可標字儀我猗氏人事孀母以孝聞母病疫盛暑侍湯藥不解衣者四十餘日撫姪宏祚至成立祀鄉賢

以上蒲州府

暴斌長子人質朴尚義宣德中徙民實塞下代兄往役時以為難

白聚良潞州人性朴實不知書母沒廬墓六年又張仲智亦

以廬墓稱孝

原按孝子傳白聚良作唐人

王俊潞州人親沒廬墓日夕哭泣負土成墳弔者至惟稽顙
不出一語三年盜賊虎狼無敢相犯里人欲舉其孝則曰人
子自盡其心何辱旌爲里人化之有張攢張提車桐郭景榮

俱廬墓云

原按孝子傳作唐人

仇鴻長治人給事中敏之曾孫孝弟順義居喪盡禮又仇時
濟五世同居百有餘口歡然無間嘗與弟立家範以爲世守
仇朴亦敏之後與弟欄事繼母如生母母疾朝夕侍奉比卒
廬墓三年旌曰二孝欄尤以讀書執禮聞于時

陳德海壺關人事養母閭撫幼弟某以孝友稱

李芝蘭長子人父母年俱八旬晨昏左右婉曲承歡時推孝

子

李清屯留人性篤孝母沒廬墓狐兔爲之馴擾宏治中旌
王進朝平順人五世同居又劉守全七世同居並以義門旌
原富長治人傭工養父父年八十二疾篤思肉貧弗能得割
胸前一鬍烹而進之父以爲美詢所自來曰乞諸鄰疾良已
而刃傷浹旬亦遂平楊廉訪飭表其閭竝給庖廩云

路何長治人與妻王氏竭力事親手製馬策鬻供父飲父既
卒母年愈高左右扶掖不少息家計漸裕母好周濟旬嘗先
意成之自少至老未嘗出一件語

李文志長治人母老寢疾夜思肉食甚急引刀剖胸肉進之
疾尋愈

趙應格襄垣人家貧鬻飯竭力事親委曲承順不少倦

王子順長治廩生父年九十母年八十有四母沒時方嚴冬飲水跣足凡七日哀毀慘戚茹素終喪當道欲爲申請力辭之由貢生官教授

韓錦潞城人世敦孝讓自高祖和至孫子昭六世同居又同邑李昇自高祖德亨至姪珉等亦然俱于成化六年旌

張倫潞州諸生幼孤事母孝母卒廬墓間穿井無水焚香拜泣泉湧出成化中旌其門後由貢生官東阿訓導

仇森字時茂潞州人潘恭儔王選爲儀賓傳家孝友數世同居立祠堂飭家範初祠堂成祭畢作誓詞云吾家子孫及諸婦敢有不孝不弟不同心協力或積異財謀分析者祖宗達于神明殛罰之家東火村正德間迎養祖母陳於城中妻子偕往已而流賊奄至得免賊退聞有不從賊死者趙袁焦王

四婦白於巡撫王立碑建祠嘗積雨行途中苦甚卽覓工自
南莊至城皆平治之凡士與大比必餞贐之曰此吾里選之
賢也一日感寒疾方汗因先人忌辰冒風祀於祖宅疾復作
次日卒著有玉松稿家譜雄山集鄉約集成貞烈倡和集諸
書

劉斌長治人正德辛未流賊掠雄山兄穩被擄斌冒險趨救
泣請身代賊怒舉刃加頸斌不爲動賊併釋之

王修身黎城人太學生能文辭善事親親終廬墓側呂涇野
棊嘗就訪焉嘉靖中以孝旌一時名流咸爲詩贈之又馬大
猷邵孟夏俱以廬墓稱孝

善志又有王修事蹟相同當時一人

王大節長治人父相客死延安以遺腹生及三十五歲母出
亦卒時方爲諸生投牒于郡裏糧徒跣遠尋父骸有高年王

萬牙指告所瘞處然恍惚莫可憑恃大節稽顙神擲褚錢
視所向求之果得石碣抱尸痛絕輿還合葬隆慶三年郡邑
以聞賜帛表其居

仇大長治人六世同居先後節烈貞女二十三人萬厯中旌
其門

申志皋長治人與弟志伊事親篤孝父沒哀毀骨立志皋至
損一目其母喪明方祈天求代也母沒廬墓三年萬厯間旌
爲雙孝

栗瑢長治人沁源榮靖王儀賓事兄撫弟以恭謹著同居不
私積財弟欲異居瑢弗能止乃曰吾不得爲張公藝爲薛包
可也推產與之子應宏有文名

栗永馨字子明長治人幼孤事母務得歡心比沒手自爲志

志成書石一字一淚文悉爲涕淚所灑至再至三書乃得就
由舉人官通州牧有政聲

張斗南黎城諸生家貧竭力事親父年八旬時嬉戲以悅之
宣化長子諸生父浩卒廬墓三年以孝行旌

鮑希顏字復軒長子人性至孝家貧舌耕供養主人以絺襪
綿襖饋之不自用歸奉其祖再與之又歸而奉其父自受寒
凍不覺也由進士累官至遼東巡撫

王卿字上寶長子廩生山居養親不就歲薦親沒哀毀骨立
日夕號哭有司表廬稱孝

裴可長子人家貧傭賃奉母日具黍米饅餌無少間母喪明
奉事益謹

邢明教長子人家貧父老病竭力醫治妻高亦盡養不少懈

王丕式長子人親疾籲天乞代比沒喪葬克致哀盡禮
霍惟德長子諸生事親竭心奉養飲食蔬果不敢先嘗
張拱端屯留諸生父沒廬墓形色憔悴幾至傷生

張附翔平順人萬厯間貢孝事孀母義周筑獨恂恂雅飭口
不言人過任安化知縣

崔仲和襄垣人母疾思飲河水會天旱絕流露禱于天河流
遽通母飲之疾遂愈聞者驚歎後官鄆縣令祀鄉賢

連濟民襄垣人父母繼沒枕苫獨居者五年不入內室不御
葷酒不茹蔬鹽有司旌之

馬鐘潞城人事母色養兼至母嘗失明晝夜籲天明遂如初
官陵山衛教授

高可瞻黎城諸生嫡母王病劇瀉不能起躬自滌除晝夜侍

藥餌弗倦比卒悲號哀切媿于所生鄉黨稱之子鳳鳴侍母病方隆暑衣不解帶踰三月亦以孝稱

牛繼先壺關人節婦路氏子生七日而父沒比長事母色養備至由貢生官館陶訓導

郭衍壺關舉人父修以事被誣成獄衍憤曰吾父生兒不如緹縈哉及領鄉薦叩首謝天曰是衍理父寃之日也極力陳救損家貲大半父得出年老目盲而衍亦面黧髮脫矣會當計偕中寒不果行而父沒力疾悲號水漿不入口遂卒

孫田平順人父疾刲股療之

韓雍黎城諸生少孤貧授徒供母甘旨無缺待媿嫂恭順有禮母卒日夜悲號遂失明聞者感歎咸爲詩文以贈之

劉守全平順人七世同居奉旨旌表

王琴平順人家貧事親克盡子職流寇亂負母逃匿山中采薇供食力慰母心子道亨諸生有義行

以上潞安府

楊智介休人少喪父淡食三年人未嘗見其喜笑後母喪哀毀廬墓白兔馴擾人謂孝感正統間旌其門

趙澄平遙監生母喪廬墓朝夕泣奠塋中草木皆爲冬生宏治中旌

韓道兒臨縣人嘉靖十九年俺答兵入境掠其父時年十七追及之以石擊寇救父得免道兒被殺事聞旌表從祀

張鈞永甯舉人親老不仕讀書奉養孝聞遠近北寇至擄其父去號哭不絕追百餘里流矢中肩拔去復馳至則父已遇害痛絕復甦盡舐父尸遺血水漿不入口三日卒事聞旌門楊經甯鄉諸生父遭寇害誓死復仇同子淑湘提鐵棍四十

勛結河南王千勛候機躡入寇穴以雪恨邑令旌其門

陳訓甯鄉歲貢性醇篤事親誠敬撫姪慈愛特制家訓長幼
恪守無逸志

于博永甯人幼孤年十六讀書城中北寇至號歸求母母已
被執道遇之取石擊賊賊剖其心而死母得遁去事聞被旌
張永安永甯掾東父爲俺答兵所逐持挺追之擊傷二賊父
逸安護其後被數十創死旌其門

張更化汾州人事繼母孝與弟同居無閒言嘉靖中由進士
授南陽府推官累遷至山東按察司使河南左布政使所至
有聲晉階太僕寺卿致仕

曹祿字抑齋汾陽人事親孝凡修城築隄建橋穿井諸義行
皆爲父祈年而設也萬厯間餓卒遍野買地營冢清明酌酒

致祭歲以爲常郡人王緝張更化俱有碑記

劉伸原汾陽歲貢母喪廬墓晝夜悲號有盜夜半乞火與之遂化爲善至今人稱其墓爲孝子墳云

賀來佐汾陽人八歲喪父盡哀每日祭墓而後食如是者三年母病時方九歲廢寢食奉侍藥餌四閱月如一日比卒五日不食哀毀骨立親友勸解淡食終制後力學爲諸生

張榮平遙人父患風疾朝夕奉侍二十餘載未嘗處私室比疾篤至爲嘗糞父亦尋愈

邵希曾平遙諸生幼孤家貧事母張自甘粗糲曲盡色養母沒歲薦入官恨未祿養哀傷踰禮

李憲平遙人官山東布政司理問食知州俸歷官二十年號清慎事母奉甘旨執喪三年事死如生士夫竝高其行

劉士宏甯鄉諸生參政有誠子母蚤喪晝夜爲孺子泣事祖母晨昏定省自爲炊爨父遊宦邸星馳赴膝下承歡朝夕父疾篤衣不解帶比沒毀幾絕撫諸弟友愛時共稱之

任良才平遙進士初令江陰遷高郵牧所至有聲母病親嘗糞父病籲天求代誨人亦號勤懇

任義平遙舉人孝思純篤居喪廬墓三年

梁殿邦字元鎮平遙人由舉人令三水幼孤事嫡母閭生母曹曲盡誠孝居喪守禮不出戶庭者三年

趙宗堯平遙人父沒三載未嘗見齒同弟宗武事母櫛沐飲食齋勤篤家無私積周貧焚券親族賴之

王欲見字以道平遙諸生讀書守道天性孝友居喪哀毀踰常坐臥草次自始喪至大祥不入內室禫祭始食茶麪素冠

披髮三年如一出告反面不啻生存

梁州尹平遙人善事父母父病醫罔效或言割股愈病者慨然曰身親之身也以親之身行殆固不可以親之身已親之疾奚不可且苟可以已親疾雖剖心懸膽爲之何惜於一股哉乃割肉類掌糜以進父食之霍然起論者以爲孝感

梁州儒平遙人嘗割股以愈母病

武琦介休諸生母喪廬墓時有橫軍作亂逼視廬中圖書盈几外無長物曰孝子也去之後由舉人官陝西肅府審理李英俊介休人父天質狂疾投井時方灌園奔抹不及隨投井中俱死

王延介休人父病垂危籲身求代於神前割股進之病尋愈張應堯字心聖介休歲貢事祖父以孝聞兄弟七人同居立

家規十六則復定同居另舉法家長以下人各執業祭祀婚嫁宴會愧遺工作皆有度數家人干指奉命惟謹人稱義門
靳士龍介休人父世愛偕里人高汝才樵山中汝才奮拳世愛墜崖死母貧羸且遺腹冀萬一生男寢其事已而士龍生及長爲言父死狀輒泣下士龍亦泣急思雪忿以母輒中止後母卒營葬事訖乃曰復父仇償母志斯其時矣持挺出要汝才於路擊殺之語人曰四十餘年積恨今日始平遂詣縣首其事或欲爲之辨士龍曰死吾心也何喋喋爲卒死於獄
邑人哀之曰士龍孝子母亦烈女也爰以貞節孝烈旌之
武賢孝義人太學生母失明以舌餽之遂復明父母俱沒每謁墓拜跪盡禮必倒行百步餘不見墓始已聞官司傳呼聲雖暗室亦拱立埃之後令元氏以理化民民皆知勸祀名宦

文湯孝義廩生遇寇變亟走尋父時父在西鄰爲賊所困挺身往救乞代不得遂併遇害

張大發孝友好施嘗修廟及橋梁道路父喪廬墓六年母病竭誠侍養及沒悲號絕食者數日

按孝義縣志作大登

李天育孝義廩生父以酒狂詆罵鄰里其母抑之房中遂憤極自殺痛父非命遂絕飲食躡踊哀號三日而卒

田賦孝義人太學生七歲喪父慟毀骨立母病跣步不離額天請代憂瘁之至髮爲盡白弟佃遠歸權劫口吮瘡血親同臥起絲思母不置遂成病卒鄉人皆稱爲田夫子

尙義字用方孝義人有至性父卒事祖母繼母孝順備至祖母患青盲日夜哀禱尋果復明

楊樑任國究李異香胥孝義人以刲股愈親疾稱孝

賀進臨縣諸生父膺死罪請官求代詞極懇切官從之械獄中聽決者三次後奏請得宥與歲薦

賈銳永甯人幼喪父家貧事母能竭力致養遠近皆稱爲賈孝子母卒年九十八銳亦六十七矣哀毀廬墓遂卒於塋高節温勵武衛竝臨縣人以廬墓稱孝

甯孟魁石樓人事親承顏順志跬步不離事無大小稟命而行父病衣不解帶者五十餘日比沒斷絕葷酒獨居三年

許汝元石樓人父沒逋負數百金汝元語三弟曰逋不能償何以安亡靈于地下悉以償人而汝輩以饑寒非父意也更爲券自任以父業盡分三弟後倅甯州所得俸盡代償前逋訓諸弟胥成立當事榜其居曰孝友之門

賀希孔石樓諸生母張早喪事父仲賓嘗從永和負米作供

色養備至父病露禱愿減已年以益親算比終廬墓三年撫弟稱友愛

鄭登雲石樓人父病垂危刲股作羹以愈之生平好施樂善後遇賊難不屈而死

晉賢石樓人六世同居孝友姻睦旌爲義門

王錫永甯舉人官洛川教諭性篤孝父輔商沒山東扶柩西歸野宿不避雨雪旣葬廬墓三年時早霜殺禾塋左右獨無恙人謂孝感補任曹縣母喪亦如之斷絕菜鹽形瘁骨立知州王道三請歸謝曰墳死足矣竟卒

張格永甯諸生負母避難遇賊欲刃其母哭泣代死母被傷罵賊而斃

王爾梅永甯貢生官太原府訓導親沒廬墓三年

陳謨甯鄉人事親敬兄以孝友聞親喪廬墓六年兄訓亦有孝行

楊聯芳甯鄉諸生歲值凶荒兄弟俱困多方借賑以悅親心父疾不解帶者七十日母疾侍側三月憂勞成疾及居喪廬墓二年

王伯誠甯鄉人親沒廬墓茹淡肩苦終身不渝又李士光歲貢生亦廬墓張霈武舉廬墓六載

史勉甯鄉人少喪母事繼母如生母居父喪以疾卒

梁國棟永甯人闖賊陷城以衛父被四刃父遇害罵賊求死賊曰孝子也釋之時季父及弟亦爲賊殺國棟備棺掩葬負母出城隱居而終

張承相永甯人父卒事母以孝聞寇至母被執奔救遂俱遇

害賊退得其尸尙抱其母之首也有司爲請旌

以上汾州府

景甯澤州人族指千餘五世同居洪武初旌門

王敬高平人飭躬勵行洪武初舉秀才母喪傍徨墓所不忍歸者數日父沒廬墓哭奠者三年永樂間旌子璠由舉人官太僕寺丞父母繼逝廬墓六年正統中旌

王起孝高平人正統中以孝行被旌

李承恩沁水舉人令良鄉曾隨父瀚官南省會賊竊敕去追寇索還父沒忽火起他所將延及柩承恩泣禱火遂反

楊砥字大用沁水人進士官太僕寺卿父沒廬墓母喪賜鈔千錠扶輿步行歸葬以足疾卒

李振民高平人有孝行父沒哀毀廬墓會早霜殺禾近墓者獨不爲災成化間旌又楊汝節張養心俱廬墓又李璟舉人

令臨淄廬墓

徐梁陵川人五世同居宏治間旌表

李用澤州人舉於鄉宏治中以孝被旌

裴椿沁水人歲貢生幼孤事母孝母沒廬墓母素嗜茄遂種于墓側茄生連理更有烏巢鶴翔之異宏治間旌又進士鍾

鑑父卒廬墓

明史作裴春澤州人

賈志儒陽城人兄弟五人亡其三撫孤姪十數輩婚娶教養皆至成立居鄉亦有王彥方風

田祺陽城人正德間父母繼沒廬墓六年制終以孝子例冠帶

田自修陽城人事繼母孝與異母弟終身同爨撫孤姪如己子臺使旌之

李濡陵川人立家塾訓子弟共敦親睦自曾祖約祖景隆父盛至子珂孫鐘六世同居事聞旌表

曹民信陵川諸生居喪骨見衣表事繼母讓兄產以孝友旌門又嘗與弟民悅出粟賑饑里人頌之

王一欽陵川廩生七歲母死繼母張虐遇之比父沒張病嘗藥祈代孝謹益甚母竟化焉弟一欽亦有王覽風

趙友益沁水凜生父九思疾嘗藥禱神力求代得籤有金鼎折足語泣曰吾父三昆弟鼎折足凶兆也再禱于神又得問壽九九終之語悟曰子亦兄弟三人三人中惟子有子子可代父應在子乎尋果疾誓不醫藥以九月九日卒父疾亦愈事聞旌表又諸生竇緝竇綬王喜袁維新俱以廬墓旌

張希魯沁水人少商遊母偶疽發旅邸輒心動歸療之尋愈

人以爲孝感昆弟五人希曾最少長兄卒其子變復蚤夭婦
靳氏遺腹生男百方撫恤靳感之霜操彌堅季兄沒止一女
悉以遺財爲嫁資仲兄乏生計分析雖久屢贈千金無吝色
萬厯丙戌歲大禮輸粟千石詔建坊旌之有兄希曾亦好義
同心捐粟時並旌焉

霍一楠沁水諸生父客秦而病千里迎歸左右侍養會歲試
刻不忍離遂至除名

秦德沁水人性孝友兄恭無子酹酒殺人德請代罪御史行
縣疑其獄德恐不利於兄誣服棄市妻潘青年字孤以節終
張道澍沁水廩生父鎗老而鰥臥起飲食澍必躬親其事嘗
外歸聞父上牀失足傷額號慟口吮血痕左右不離時一子
痘危甚澍未嘗一視也然卒無恙人謂純孝所致

劉希曾沁水人子用韓孫光月曾孫奕昌元孫洪澤五世同居又楊崇詔子齊芳呈芳兄弟終身同爨如父命

韓肫仁沁水進士官青州守請終養旌表孝行加一級

裴爵沁水人孝子椿之子也由舉人令豐縣父喪棄官奔葬立祠隧道晨夕哭奠補令臨漳迎養養母喪哀毀如禮置祭田建社學修家規里人歸厚焉

張廷沁水諸生事繼母柳孝館杭州聞母病亟馳歸與婦楊嘗藥祈代目不交睫者五旬縣旌之刻其事於碑

韓瑒沁水諸生幼孤奉母馬稱篤孝母沒哭曰與母相依母死我何生爲疽發背七日死瑒性剛有膽寇急張督師致行間談兵事聞祖母病辭歸不出歲饑民走縣議勦徙單騎叩壘諭之賊遂解善醫旁及青烏術工書法尤善擘窠大字

朱成錢宗室輔國將軍親沒廬墓各三年嘉靖間旌

石文奎自高祖玉厯五世同居食指千餘無異意嘉靖間旌
侯勲澤州人大司馬璉五世孫父疾温衾嘗藥跬步不離比
沒哀毀幾絕廬墓哭奠羣鳥常悲鳴樹上父夔官錦衣衛指
揮僉事例得世襲勲堅辭讓弟時稱孝友

馬宗盛澤州人幼孤事母孝母亡哀毀廬墓三年不櫛髮至
結鬣盡落時有白猿慈烏集冢之異事聞旌表

宋甫澤州舉人官忠州牧父沒廬墓旌表又有張祿張祐張
智兄弟共廬母墓楊繼宗有詩美之見碑刻

秦一清澤州諸生事大父父母以孝聞時有家難悉賴調維
母喪哀毀盡禮朔望必展墓事繼母撫幼弟人無間言

姬國瑞高平諸生撫弟國瑞有恩意比沒瑯撫其子顯庭亦

如之會水漲瑠擊孤姪跨馬疾馳而聽二子徒涉曰義不得以吾子先兄子竟兩全焉顯庭舉鄉薦不仕隱于醫

裴養志高平農夫也有罪人匿里中波及其兄養正論死力請代刑已而兩釋時共稱之

田應運高平人事繼母孝撫諸弟有恩意又多義行出粟賑饑子大良諸生有父風又徐行善孝事繼母學使袁繼咸飭縣旌表

王鳳翔陽城人事親竭力跣步不忍暫離生事死葬俱以禮飛蝗害稼過其田不食人謂孝感

成靖甯陽城人幼喪母悲不自持父喪擗踊慟悼幾滅性水漿不入口三日既殯結草廬墓側僅容膝晨夕泣奠三年如一日有司問於撫按扁其門曰孝行

賈之鳳字儀虞陽城進士任正定推官父令定陶癡疾之鳳棄官晝夜馳七百里相見永訣歷官至按察使弟之龍亦有孝友聲

吳茂字德容陽城人母卒食粥啖齋哀毀廬墓地苦無水掘得甘泉並有瓜生並蒂之異楊繼宗作詩序以紀其事

陳思孟陽城諸生父仲廬墓感白兔金雀詔旌孝行思孟事嫠母亦以孝聞母沒廬墓三年從子炳失怙恃至是亦移居祠堂朝夕哭奠哀毀成疾卒縣令立石道傍題云陳氏三世廬墓處又同縣原井田諸生于大復俱廬墓

李博陽城諸生父沒寇至守柩不去賊入百計哀求乞全父柩賊不從竟被害妻延亦自經死

徐滔陽城人自高曾以來謙謹尚義至滔義行尤篤子梁孫

輝七世同居事聞旌表

白含章含秀兄弟也家陽城避亂遇賊傾囊求釋不得章曰乞殺我舍弟弟尙無子秀曰一家衣食惟兄盍殺我舍兄賊義而俱釋之

衛吾良陽城貢生母疾浣滌廁牕皆躬爲之不解衣者四年喬彬字監周陽城人十歲喪父盡禮如成人侍母日病十年不懈率弟朴力學後先爲諸生朴卒強博母歎而私居號慟不輟撫姪彌厚咸稱喬孝子

王國丞陽城人天啟間貢事繼母以孝聞父產悉讓異母弟家徒四壁英邁不羈精研經史初授河津訓導建五經堂課士升萊州教授掛官歸里

婁西陵川諸生母疾朝夕左右盛暑不怠比沒哀毀廬墓三

山陰通志卷一百三十一 孝友錄一
年又貢生徐河及從弟徐漢俱廬墓稱孝

婁雲陵川諸生父疾衣不解帶及沒廬墓三年

婁銓陵川人父疾日夕奉事久而不倦又隆冬思瓜冒雪走
求不憚百里比沒負土成墳哀毀逾禮家貧事母亦得歡心
李培秀陵川人大母年八十疾秀割股以進人以爲難

宋廷彥字聚奎陵川貢生善事養母與諸生徐居仁俱以孝
旌又徐騰雲徐啟昌王佐才王國材武立綱俱稱孝

許論沁水人母病垂危割臂以進病果愈

竇如珂沁水人母卒廬墓三載以孝稱

段讓沁水人孝友端方兄弟共爨至終身工詩以多藝稱
王希聖沁水舉人幼孤貧與弟淑聖孝友甚篤時稱二難
張瑩沁水諸生母死粥食三年不除腰紐與二弟同居終身

趙家珍沁水廩生幼孤母竇教成之事母以孝聞崇禎間旌
趙永健沁水人幼喪母父家璉繼娶商氏撫之極慈永健事
商如所生以孝著及壯食廩不幸卒商與媳呂撫遺腹子呂
事姑竇氏備極辛苦會竇卒家璉亦卒商雉經以殉呂救得
甦姑婦相依矢志靡他賢慈孝節並萃一門焉

趙完璧沁水人崇禎五年紫金梁亂奉母王及妻李避守高
樓賊用火攻之李先自縊璧依老母不去同死烈焰中

以上
澤州

沈文義大同人事親孝父病走恒嶽祈代病尋愈壽至八十
有六讀書好義置學田五十畝助族中婚喪資商文恪爲著
傳

焦鑑大同府諸生侍父不離左右家貧勉致甘鮮父卒哀毀

柴立旬劬墓側悲號不徹歷三年足不入城成化中旌

楊茂楊瑞胥大同人成化中以孝旌

王經應州廩生事繼母汪以孝聞母卒廬墓成化中旌

明史
安東

中屯
衛人

王誠渾源人官任邱縣丞父卒廬墓烏兔馴聚成化中旌

明史

作慶
都丞

張瑞大同人以貢官陵縣令母卒廬墓父振止之父卒遂廬

墓側插部內侵堅守不去事聞旌表

盧鉞大同人三歲失母父達不再娶以託寡嫂楊氏遂雲遊

鉞八歲忽哭痛曰母則亡矣宿無父乎楊告之故正德間鉞

由監生授河南左長史棄官尋父誓不得父不歸數載至平

涼泣禱于神依夢往翠屏山遇老人楊譽如夢所見則其父

奕友也父沒已久鉞易棺函骨見有棋子爲殉宛然不朽會
兵圍平涼鉞獨守不離賊曰此中有孝子害之不祥遂解
圍去事聞賜達爲義夫贈承德郎鉞爲孝子封亞中大夫旌
門

溫鉞大同人父景清有膽力嘉靖三年鎮兵殺巡撫張文錦
其後巡撫蔡天祐令景清密捕首惡戮數人其黨恨之十三
年殺總兵李瑾因逼索景清深匿不出遂執鉞及其母王氏
令言所在鉞曰爾欲殺我父而使我言是我殺父也如誓不
可解則殺我舒憤足也賊不聽逼母使言母大罵不輟賊怒
支解以楸鉞鉞大哭且罵并被殺事平母子竝獲旌
喬景華山陰人嘉靖間扶母避寇其父稍後見執華復奔救
翼之右臂受刃更易左臂父子仆地寇感其孝而去

趙榮貴大同人事發母張跬步不離母疾到股進之終不起
哀毀廬墓成疾而卒

陸應祥大同人六世同居人無間言

朱充燿大同人幼孤哀毀如成人事母克孝母卒廬墓三載
王琳字獻雍大同貢生有學行事繼母撫幼弟以孝友稱賑
饑掩骼人多其高義

朱鼎濂奉國將軍父病嘗糞祈代比卒竭力治喪葬日雪甚
仰天哀禱忽得晴霽事母亦孝詔賜四品服金千兩

武彥爵大同人冠帶總旗母疾呼天求代尋疾愈比卒哀毀
廬墓三年

王汝濂懷仁進士年五十例得銓用以母在託疾歸養母卒
旦夕跪哭隆冬忘寒以鶴膝疾終

王志仁懷仁人有孝行父母不睦竭力調持母疾左右嘗藥比卒哀戚三年父性甚嚴而特憐其孝云

成以簡字可臨山陰諸生幼喪母撫于繼母周父卒兄繼亡以簡事繼母養嫂盡誠敬撫兄遺孤成人鄉居多行義王清初爲作傳

馬璧山陰人四世同居父卒廬墓事繼母以孝聞旌表

唐鑑應州人官都指揮母疾割股療之

孫震渾源人父病祈天求代母病割股以進皆獲愈震孫逢吉官至布政

石鵝渾源諸生父彥芳沒哀毀廬墓會大雨山漲木石漂沈伏墓號泣水將及墓忽分爲兩從旁潰出事聞旌表

董莒廣靈諸生父宗顯令冠縣父卒哀毀骨立散財與弟事

繼母如所生以孝友著由貢生官壽州判

趙昌齡廣靈人母卒廬墓三年由貢生令封邱柘城二邑廉能有聲

胡登應州貢生官鎮江經歷父世嚴羈塞外登具狀總督請得兵衛出塞力挾父以歸

李夔懷仁人家貧親老以貢任潼關訓導乞養歸親卒廬墓避寇入城曰某不敢以父母遺軀忝賊毒手也寇退復廬墓終喪子某官參議

以上大同府

麻登雲右衛人父剛患寒疾醫曰糞甜則愈嘗之覺苦哭赴城隍祠祈以身代父思肉食割股進之疾遂愈

吳順朔州人父病閉結藥不能通泣而舐之又病瘦嘗其糞苦喜曰是固無恙亦以醫治得愈父思雉羹遽索不得忽雉

飛墮其家作羹以進父卒時順年已七十矣哀毀廬墓終制
正統間詔旌九十賜爵一級壽百餘歲而沒一時皆稱爲異
人云

馬璠右衛指揮舍人性至孝父祿行商蘇州沒旅邸璠欲取
父尸母以年幼不許璠曰父死不葬何以自立於天地間遂
自縊繩斷聞人語曰汝自去可保無虞遂與兄璋負父尸還
葬終身養母不懈

陳宗堯左衛人嘉靖丁巳父定被掠閱八月定死宗堯潛往
化尸還葬撫按上其事令賞資以旌之

孫文朔州諸生父卒廬墓三年母亦如之有司以聞旌表

覃師孔右衛人苑馬寺卿父應元令厯城師孔隨任早作夜
眠以慰父勞父疾籲天求代卒後事母色養備至以孝稱上

朔平府

杜登第偏關人幼孤事母劉甚孝宴會必懷鮮遺母以明經任河南少尹

楊春時偏關人事養母張得歡心有所訓跪而受之官開州牧

徐時進偏關貢生性孝友母卒父以時進孝不再娶

萬邦應偏關諸生父世武以鹽引事下獄論死號泣求代卒免父沒扶柩歸竟入關城曰刑罰是甘不忍置父郭外又族姪某將爲變苦勸不從曰吾甯身試百刃不忍目擊赤族也觸牆而死妻宋無子以節著以上甯武府

右明諸府屬三百十五人又五十人附見

補遺

程宗齊陽山人性肫摯親疾求以身代及卒哀毀廢食愛弟宗望誓不析居嘗置義冢及園畦三百以贍族人

白祥文水人父賁令長山以事連坐當刑祥願代之臨刑神色不變成祖嘉其孝父子俱免遂大宥天下銜恩者多繪祥像祀之

孫士亭臨縣人流寇至扶父走避賊迫及射其父亟持鋤奔賊擊之賊棄弓矢走引羣賊共射士亭身中十七矢死父逸得免事聞旌表從祀

王仲達澤州人洪武二年舉孝廉令中江秩滿乞歸終養承樂間言徵起堅志乞養如初賜敕獎諭給紗錠以歸

孟瀚澤州人自祖林至姪覽五世同居財無私蓄庭無間言人高其誼

